
FAULA PRIMA.

L' INTENDENT E 'L POUJ.

Vers l' an dla creassion mila e trzent,
Cioè dnans dl diluvi, j' animai
L' avio la parola, e 'l sentiment;
Ansi j' è chi pretend ch' al *Paraguai*,
Ant 'l *Mississipi* ancora adess
Le bestie e j' abitant a parlo uguai:
Così souta coul clima a l'è permess
Ai givo, ai prpojin, ai can, ai gat,
D' risponde biff e baff al Re istess:
E mi ant un manuscrit rusià dai rat,
I l' ai trovà na nià d' sti racont,
Ch' a son tutti datà dal sent e quat.
Fra-j' aitri ai n' era un lepid pr l' appunt
Tra un Pouj, e n' Intendent, ch' era *Comess*
D' *Xersse*, 'l qual regnava sl' *Ellespont*;

Sto-sì l' era un fachin costrutt espress
 Pr stè con la canaja sui canton
 A ramassè i stivai , vende se stess.
 Ma pur la bonna-grassia d' so pàtron
 L' ha fane un Intendent li su doui pè ,
 Con spà , pruca , e vistì caria d' galon.
 Senza conosse l' ombra d' so mestè ,
 Savend appena scrive e fe so nom ,
 L' è stait an dontrè-di brav finansiè ;
 Scortiaava tant i rich , coum' i pover' om ,
 Creava a ogni stagion di neuvi tass ,
 Trattava coul pajis Nosgnour sa com !
 Vistiendssè un di , s' è vist coure su un brass
 Un Pouj..... mes-an-riand : E ti birbant
 (Ai diss) sui me galon t' na vas a spass ?
 E credstu chi sia un mendicant ,
 Un gheu , un om d' la plebe , un disgrassià ,
 Un sccianga-fanga , un pover , un furfant ?
 A l' è coula gent-lì , ch' son condanà
 A esse rusià viv dai verm , dai pouj ,
 Ma-nen un om , ch' a l' ha l' or a palà !
 Che gran distanza j' elo peui tra noui ,
 (L' autr ai rispond) savive forsi-nen
 Ch' j' ouma l' istess impiegh e mi e voui ?
 La differenssa a l' è tra 'l pi , e 'l men :
 Dl rest noui i vivouma e l' un e l' aut
 Dl sang dla povra gent e dl so ben ;

E com ant la natura un mangia l' aut :
 L' aragn mangia la mosca , e peu i strunei
 Ciapò l' aragn , e peu 'l farchett pí aut
Grimpa quand ai arriva j' aitari osei ,
 Fin tan ch' 'l struss , o l' aquila , o 'l milan
 Divoro peu 'l farchett da bon fratei :
Così l' è pì che giust , che un pouj pian-pian
 A rusia pr drit publich n' Intendent ,
 'L qual l' ha già rusià 'l gener uman.
Oltre d' loli : noui doui souma parent ,
 E mi se i l' hai da dive la vrità ,
 I son vostra progenie an discendent :
Mi son fait da na Lendna mac jer dla ,
 La qual a l' è peui fia d' coule tai
 Ch' j' avie ant i cavei quindes-dì-fa.
Ditt lò 'l Pouj vola via , e l' aut sonai
 A resta tutt brodà con tanto d' nas ,
 Sentiend che 'l Pouj e chiel a l' ero uguai
E fait dl' istessa pasta e dl' istess vas.